

No. 61. 1391. 2. Sept.

*Die Bürger und Rathslute bearkunden die Stiftung eines Seelgeräthes zu Unser Lieben Frauen durch Hannus Ysinhut.*

Wir burgere vnde ratlute der stad czv Myszin, Frydrych Ekelman burgermeystir, Nyckil von der Heyde, Pecz Schroter, Olbrecht Cappelndorff, Nicze Buckewan, Hannus Lozeman, Hannus Hutirmayt, Hannus Gebysch, Hermanchin, Laurencz Zeyckryczey, Pauwil Buckewan vnde Petir Kale Jacoff dy iczunt syn bekennen —, daz Hannus Ysynhüt dem got gnade hat ggebin czu eyne ewygin seel gerete vnde gedechtenisse syner sele Angnysen syner elichin wirtin dy noch lebit, Henczen von Dere dem got gnade, Elyzabethen Henczen von Dere elyche swestir der got gnade, dy do ist gewest Hannus Ysynhüt elyche wirtin, vnde vnser allin seelin zcu troste vnde gnadin czwenzik schog gutir grosschin zcu vnser lyebin vrowin kyrche vnde cappellen, wenne wir egnantin burgere vnde ratlute dy yczunt sin vnde vnser alle nochkommelige vorsteher vnde vorweser syn der egnantin kirche vnd brucke, daz wir sullin kouffin eyn ewyge schog geldis, vnde sal daz ewyge schog geldis noch begerunge des egnantin Hannus Ysinhutis alzo teylen, daz eyn halp schog sal volgin czv den dren kerczen vnde dy da mitte bessern alle iar, dy man phlegit czu trayne vor dem heyligen waren lyham alle dornstage vor der messe vnde noch der messe; vnde czu dem andern geluchte, daz czu der messe gehort, zo sullin zewene schyllinge grosschin czu dem ewigin lichte yn der selbin kyrche vnde cappellen ewiglichin volgin. Zo dy andern sechs grosschin sal man alzo teylen: wenne man beget iargezeyt des egnantin Hannus Ysinhutis, Angnysin syner elychen wirtin dy noch lebit, zo sal man gebin den czwen herren, dy da pherrer syn von der vygilyen yczlichin funfzen heller vnd dem glockener sechs heller, daz her sulle luthen, vnde dy iargezeit sal man begen myt der vygilien an dem drytten tage vor aller goczheyligen tage vnde mit der messe an allir goczheyligen abunde; vnde dy andern dry grosschin sal man glychirweys teylin, als dy erstin dry geteylt sin, wenne man beget dy iargezeyt Henczen von Dere dem got gnade, vnde Elyzabethen syner elichin swestir, dy da ist gewest Hannus Ysinhutis elyche wirtin: yezlichim herren funfzen heller von der vigilien, dem glockener sechs heller zcu luten. Dy iar geczeyt sal man begen mit der vigilien an dem nestin tage noch vnser vrouwintage wurczeweje, vnde den andern tag mit der messe. Daz dis sehel gerete vnde gedechtenisse gehaldin werde, czu eyne warin bekentenisse habin wir egnantin burgere vnde ratlute vnser stad ingesegel an dissin ouffin bryff lazin hengin, der ggeben ist noch Cristi gebort dryczenhundirt iar yn dem eyn vnde nunczygistin iare an dem nestin sonnabunde vor vnser lybin vrouwen tage lezer.

Nach dem Orig. im K. Haupt-Staatsarchiv zu Dresden wie No. 59.